

Dia 25 di Maart proximo..

PREMIO PADU DEL CARIBE '98 DEN CAS DI CULTURA..

Fotos y Texto: Jan Poets.

DEN AMBIENTE



** Dia 25 di Maart proximo lo bay tuma lugar den Cas di Cultura, e prome edicion di "PREMIO PADU DEL CARIBE '98". Tabata programa pa realiza e premiacion aki riba dia 17 di Maart proximo, pero tumando na cuenta cu riba e anochi aki tin un manifestacion cultural riba Plaza Betico Croes y ta algo tracional cu mester ser respeta, a tuma e desicion pa organisa e premiacion riba e fecha di diaranson 25 di Maart. Durante e siman aki lo instala un comishon cu lo bay evalua e

artistanan cu merece nan reconocimiento di ricibi e tan respetable premio di Padu del Caribe. E artistanan aki mester ta esnan cu realmente a destaca y a sobresali durante aña 1997. E anochi aki lo bay ta uno grandioso cu presentacion di e varios artistanan cu lo ricibi nan premio y tambe un artista di fama internacional cual lo ser publica na su debido tempo. Pues keda pendiente pa mas informacion tocante e prome edicion di "PREMIO PADU DEL CARIBE '98"..

Dianan 27,28 y 29 proximo...

CHILINDRINA DI E SERIE DI CHAVO DEL 8..LO TA NA ARUBA..



** Informacionnan cu DEN AMBIENTE a ricibi ta cu e famoso estrella mexicano Maria Antonieta de las Nieves mihor conoci como e CHILINDRINA lo ta na Aruba pa 3 show.

E tres presentacionnan di Chilindrina lo ta durante e weekend di 27, 28 y 29 di Maart proximo. Esaki sigur ta un bon noticia pa tur esnan cu ta sigui e serienan di television na e canal mejicano, na unda cu henter famia ta diverti

pasando ratonan agradabel cu ta pone tur hende lubida nan proplemanan.

Awor por disfruta di e show maravilloso di Chilindrina den un forma envivo. For di e empresarianan local, esta Sandra Suarez Croes, accionista di Top 95 y ruman di e joven director Edmond Croes, por a compronde cu e preparacionnan ta den full swing pa por presenta e tremendo show aki na Aruba.

Sandra a declara na DEN

AMBIENTE cu e show aki no ta facil pa trese for di Mexico te aki na Aruba, ya cu aki ta trata di un show costoso, pero ta haciendo de lo maximo pa tene e entrada na un prijs humilde, pa asina duna oportunidad pa henter Aruba goza di e show aki.

Na caminda pa ricibi Chilindrina na Aruba, tur atardi for di 5'or pa 6'or lo tin un programa dedica na Chilindrina, pa di e forma aki suministra tur e informacionnan valioso, den cual lo haci esaki den un forma atractivo cu premionan di sorpresa.

Esaki no ta e prome actividad cu Suarez Production ta realiza aki na Aruba. Nos por recorda ainda e Circo Suarez cu a causa un impacto formal cu su bunita y luhoso shownan. E show aki lo bira un gran espectáculo combina cu canto y baile di gruponan local pero tambe lo tin malabarista, payaso y tambe shownan di mago.

Keda pendiente pa e prijs di entrada y tambe e lugar na unda e show lo bay tuma lugar. Pa cualkier informacion por tuma contacto cu e oficina di Sandra cu ta actualmente na e studionan di Top 95 na Sta. Cruz tel:85900 of na cas tel: 858233. Pues muchanan...ata bosnan cos...bisa mamai y papai pa no haci ningun compromiso riba e fechanan aki, pasobra ni pa nada di mundo...nos no ta perde e show di CHILINDRINA..

ARUBA UN BIAHA MAS A DEMOSTRA CU NAN TA GUSTA E COMEDIA DI PACHI

** Durante fin di siman ultimo, Pachi Damon y su formidable grupo di comedia "Pro Arte" un biaha mas a deleita Aruba cu su tremendo comedia "Ami ta nace, abo tin cu bebe pa bira". Tur e tres anochinan Cas di Cultura ta bon bishita na unda e gran amantenan di bon comedia a disfruta inmensamente di e fantastico obra aki. Mester bisa cu hopi di esnan a keda confundi si e comedia ta sigui si of no, cual a afecta e funcion di diabierna un poco, pero sinembargo diasabra anochi e interes tabata asina grandi cu hopi hende cu a purba pa haya un entrada na porta, mester a conforma nan mes cu e mala suerte cu e sala tabata sold out. Tambe mester bisa cu esnan cu ya tabata tin nan caarchi cumpra for di antemano a yega laat y kier a cambia nan caarchi pa diadomingo anochi, cual naturalmente no por ser acepta debi cu esaki por trese

hopi problema si e anochi resulta den un sold out.

Pa loko tabata trata e ultimo funcion di diadomingo, esaki a termina den un broche di oro cu un publico hopi bon anima cu a goza for di inicio te na final. Hopi satisfecho Pachi Damon y su grupo di comedia a viaha e mesun anochi despues di e funcion pa Curacao. Nan ta sumamente agradecido na e publico di Aruba, kendenan un biaha mas a sa di duna nan un apoyo sin presedente. Pa Pachi y su grupo, esaki ta un record historico cu hamas nan por lubida di estrena nan comedia aki na Aruba y presente un biaha mas sin a presente na nan propio pais Curacao y ambos biaha esaki a resulta den un exito grandi. E comedia aki lo ser presenta na Curacao den e prome weekend di April, na unda despues di e exito grandi aki na Aruba, e espectativanan ta sumamente grandi na Curacao.

Pachi Damon a priminti cu prome cu fin di e aña aki, e lo bolbe Aruba cu un comedia nobo nobo, pasobra nan ta stima e publico di Aruba mescos cu e publico di Aruba ta stima nan manera por mira riba e foto e publico dunando Pachi y su grupo un ovacion riba pia na final di e comedia..

